

■ COLUMNA

Tgi è la culpa da mia miseria?

DA URS CADRUVI, SECRETARI
GENERAL DA LA LIA RUMANTSCHA

Tgi che vul esser cuntent, avair success ed ina vita che fa senn sto sa sviluppar cuntinuadamain. La sfida è co ir enturn a moda effizacia cun la midada. La midada – in sinonim per la vita. Nagut n'è constant. Tegnair e sa tegnair vi d'insatge maina mo en ina direzzion: a la sventira. La suletta constanta en la vita è la midada. Flurs sflureschan per puspè flurir la primavaira. Senza l'enviern na datti nagina stad.

Igl è damai inevitabel da sa confruntar cun la midada. Ma per emprender co ir enturn cun la midada stuain nus sezs ans sviluppar vinavant cuntinuadamain. Nus stuain emprender da laschar liber. Laschar liber veglias persvasiuns, cumportaments da bliers onns, damai quai che chaschuna noss problems actuals. Sa sviluppar vinavant signifitga surpigliar responsabladad per sasez. L'atgna responsabladad, en sia furma consequenta, na cuntansch'ins betg d'in di a l'auter. Quant gugent surpigliain nus la rolla cumadaivla da l'unfrenda che sforza ils auters da sa far quitads per nus. La rolla ch'ans permetta d'avair compassiun cun nus sezs e ch'ans lascha cumplanscher ch'ils auters èn la culpa da nossa miseria.

Tgi che na vul però betg surlaschar sia ventira als auters prenda sez las mastrinas enta maun e surpiglia responsabladad per ses pensar, far e sa cuntegnair.

Nua che jau sun vi jau esser. Nus delegain gugent nossa

responsabladad per las atgnas experientschas als auters: «Ti has fatg vegnir trist mai» e spetgain lura che l'auter sa deportia uschia che nus n'essan p. ex. betg pli trists. Questa tenuta rinforza il sentiment da l'idea «Mia ventira dependa dal cumportament da l'auter.» Quai ans fa vegnir dependents e flaivels.

Noss magasin da flaiveltezza è plain dad offaisas da pli baud. Tut quai che nus avain fatg tras è memorisà en noss tscharvè. Surtut nossas experientschas fatgas d'uffant (smanatschas, temas), da quel temp che nus n'avevan propi nagina pussanza. Questas experientschas da betg avair pussanza che derivan da l'uffanza vegnan savens svegliadas a moda andetga ed automatica sche nus ans sentin sco creschids surdumandads en tschertas situaziuns. Esser senza pussanza vul dir esser in'unfrenda. E co pudain nus ans deliberar da questa rolla d'unfrenda, da questa trapla da nunpussanza? Tras atgna forza.

Sviluppar l'atgna forza vul dir: S jau sun il schef. Jau sun la persuna che furma mes patratgs ed uschia era mes cumportament. Jau na spetg betg fin che auters umans u tschertas situaziuns ma fan ventiraivel. Sulettamain jau sun responsabel per quai che jau fatsch e fatsch tras. Avair atgna responsabladad vul dir utilizar il medicament il pli effectiv cunter il lamentim e da viver tenor il motto: «Nua che jau sun, vi jau esser.»

Quai ch'è, quai è.



Umans che na vivan betg a moda autodeterminada fugian gugent en projecziuns, sch'ina situaziun u il cumportament dals auters na correspunda betg a lur spetgas. En quella moda abstraheschans els savens da sasezs e descrivan empè «quai là dadora» sco insatge negativ. Els dattan a quel là dadora nums sco «idiot» u «fundamentalist». Els sa schluitan en lur rolla d'unfrenda. Quai als dat il sentiment dad ina giada dapli avair raschun e la conferma che tut saja «merda». La finala vul ins, sch'ins n'ha gea uschiglio nagut, almain avair raschun! Surpigliar atgna responsabladad vul dir acceptar «Quai ch'è, quai è.»

Quai na vul betg dir che nus stuain simplamain acceptar ils fatgs, esser exposts a la pussanza dal destin, supportar tut tal e qual ed ans cuntentar cun quai ch'ans vegn attribui. Atgna responsabladad signifitga en quel cas «Jau sun per

quai ch'è. E sche quai na ma plascha betg, mid jau quai uschè bain sco quai che jau poss.» Libramain tenor il motto: «Love it, change it or leave it.»

Ina gida nagin da lamentar. Il pli pauc sasez. E quai ans maina a la dumonda finala: «Tgi è la culpa da mia miseria?»

Tgi n'enconuscha betg questa situaziun? Il temp è scart, la bursa vida. Anc svelto retrair daners al bancomat a la staziun avant ch'il tren parta. Tge cletgada! Mo ina persuna che stat davant il bancomat. Il temp duess tanscher. Ma i vegn tut auter. La persuna che retira gist daners controlla probablmain tut ses contos da banca, dovra ina quitanza per sia transacziun e... quai na dastga betg esser vair! Mida ella usser anc il pin da sia carta? Il temp è spirà, Vossa bursa anc adina vida. Vus stuais curren. Senza daners. Uschiglio perdais Vus il tren. «Idiot», vegnis Vus a pensar. E quai vegn probablmain anc ad esser l'expressiun la pli gentila per la persuna al bancomat.

Pertge resentin nus talas situaziuns en quella maniera? A moda uschè emozionala? Pertge ans agitain nus pervia dad uschia insatge? La risposta è simpla. Nus essan partids d'ina supposiziun irraziunala sfurzada. Nus essan partids dal fatg che nus lain svelto retrair daners al bancomat a la staziun. Sco quai che nus faschain adina. Bancomats èn qua per quest intent. Quai è ina lescha!

Cun ans grittentar e qualifitgar la persuna al bancomat sco idiot

surdain nus nossa responsabladad per nossa experientscha. La persuna al bancomat è la culpa che nus n'avain ussa nagins daners en la bursa. Ella s'empo che nus stuain ussa curren. Ed ella s'empo era sche nus perdain er anc il tren.

Tge pudain nus far cunter talas grittas? Nus stuain ans dumandar: «Tgi ha il problem?» La risposta è clera: jau! Perquai che jau hai prescha, hai er jau il problem da vegnir memia tard. In'enconuschientscha deliberanta, ubain? Jau na stoss en l'avegnir damai betg pli spetgar che «l'idiot» là davant midia ses cumportament, mabain poss cumenzar immediat tar mamez.

Uscheditg che nus essan però persuadids che tut tschels èn idiots na pudain nus betg ans sviluppar vinavant. La situaziun è mes coach – quai è la tenuta la pli effectiva en contact cun la vita e la midada. Tgi che viva tenor quel motto sviluppa atgna pussanza e surpiglia atgna responsabladad. E quel che surpiglia responsabladad per sasez decida da crescher cun las sfidas da la vita. Quella persuna vesa las difficultads ed ils eveniments nunspegtgads numnadamain sco lecziun, sco intimidaziun d'emprender. E cun quella tenuta crescha ella il senn per ina vita en in mund che vegn di per di pli nunsurvesaivel e ch'enconuscha surtut in: la midada.

Per finir anc questa remartga: Tut las parallelas u analogias en quest text cun la situaziun e las experientschas en connex cun il rumantsch grischun ed ils idioms en scola èn spira casualitad.